



Universitätsbibliothek Paderborn

Johannis Trithemii Spanheimensis Primo, Deinde D. Iacobi Maioris Apvd Herbipolin Abbatis, viri suo aeuo doctiss. ... Partis Opera Historica, Qvotqvot hactenus reperiri potuerunt, omnia

Partim E Vetvstis Fvgientibusque editionibus reuocata, & ad fidem
Archetyporum castigata; partim ex manuscriptis nunc primùm edita ;
Qvorvm Catalogvm Aversa pagina exhibet

Iohannis Trithemii Spanheimensis Primo, Deinde D. Iacobi Maioris Apvd
Herbipolin Abbatis, viri suo æuo doctissimi Secvndæ Partis Chronica
Insignia Dvo - I. Coenobii Hirsavgiensis, Diœcesis Spirensis: eius
foundationem & progressum ab Anno Christi DCCCXXX. vsque ad Annum
MCCCLXX. II. Coenobii ...

Trithemius, Johannes

Francofvrti, 1601

LII. Ioan. Trith. Evchario Heimerio Neometensi Salutem.

urn:nbn:de:0128-1-17336

cum ipse sua probitate simplex versipellium astutias non satis intelligat. Cogita demum pater colendissime de tuo fratre vnico, magistro Iacobo Trithemio, mihi quidem amicissimo, ne frustra laborans apud Lymphurgenses ingenij nobilis iacturam patiat. Nihil enim ab eis emolumenti consequi poterit, qui lapides & ligna reuoluentes nullum peccatum habent commercium cum studio scripturarum. Homo est natura gracilis, ad philosophiam natus non ad labores rusticorum, qui si quid magni se consecuturum sperat, ab istis hominibus certius certo seductum se sentiet. Esto pius in tuos qui in alienos semper clementissimus esse consueuisti. Tot enim tantisque notus ac familiaris principibus cum sis, non erit tibi difficile fratri aliquod impetrare munus Ecclesiasticum, unde vitam honeste cum literis ducat. Qui toties pro alienis deprecatus exauditus es, pro tuis interueniens nullam patieris repulsam. Valeat tua dignitas per secula multa. Ex Spira Idibus Nouembris Anno salutis M.D.V.

LII.

IOAN. TRITH. EVCHARIO HEIMERIO

Neometensi Salutem.

PVLCHRE mones, Eucharie, ad nostra citius reuertamur, quasi non vbique sit nobis patria, quibus & Christiana religio patrem & matrem deserere pro Dei amore precipit, & monastica institutio contemptum terrenorum omnium indicit. Nos enim quadam necessitate compulsi principem sequimur, non ut curiales, sed potius ut consilio & auxilio indigentes, utpote qui derelicti à necessarijs grauiora pericula formidamus. Quam temeritatem à Cynonotis contumeliam susceperimus te minime latet, sub quorum diutius militare imperio non facile consentiemus. Cum his nonnulli ex nostris infidelitatis spiritu pleni conspirantes in nos, malicia virus addiderunt, qui circumgyrantes multorum nobis æmulorum inuidiam auxerunt. Placuit ergo nobis ad tempus cedere malis, donec tandem experiantur nostri, quid eis nostra eatenus presentia contulerit boni. Et quia non satis constabat, quando patria exiimus, qui fuerint tantorum in nos auctores malorum, & qui ex nostris conspirasse cum æmulis dicebantur, se omnes clamabant esse innoxios. de consilio & assensu clarissimi principis mei Philippi comitis Palatini (quod te minime latet) crebris postulationibus Serenissimi principis Ioachimi Marchionis Brandenburgensis euecti, patriam relinquere consensimus, ad festum Paschatis Deo largiente reuersuri ad Rhenum. Interea si poenituerit æmulos patrata contra nos temeritatis bene factum erit reuertemurque ad monasterium. sin autem in sua pertinacia permanserint, si pro iniurijs se non recognouerint, si fratres nostri non aliter quam hactenus cum duce suo tractauerint, hærebimus & nos nostro consilio, neque humiliabimus nos inimicis nostris, neque ad monasterium reuertemur, sed prouidebimus nobis de alia mansione, ubi cum pace & tranquillitate omnipotenti Deo in ordine seruiamus. Iustam enim causam indignationis habentes iniuriarum non facile possumus obliuisci, neque deinceps hominibus illis confidimus vnquam, qui in nullo à nobis læsi, tantam in nos contumeliam agere præsumperunt. Sufficiat æmulis nostris quod pro Christi amore patientiam habentes vindictam non quæramus, & cum possemus vlcersi contumelias silentio transimus. Putabant nos mentem vni colligatos loco, & quod nobis in despectum fecerunt necessario non curare, quasi extra Spanheim nobis desit locus ad manendum. Confidimus in Domino Iesu qui nullum dereliquit vnquam ad eum in tribulatione clamantem, quoniam miserebitur nostri, & parabit nobis locum, ubi cum maiore pace & tranquillitate ipsi vacemus, quam in Spanheim potuimus vnquam. Non delectant nos (ut tu arbitraris) curiæ principum, neque terreno principi nisi oporteat, statuimus adherere, quamquam non desint plures, qui nos magno desiderio admitterent perpetuo refouendos. Hoc nobis continuum studium contulit scripturarum, ut mentem non loco figamus sed veritati. Quæ de fratre monuisti libenter accepimus, cui fors cum tempore pinguior assurgat. Vale & ora pro nobis ad Deum, qui solus omnia potest. Ex Berlin octaua die mensis Ianuarij Anno Domini 1506.

LIII.

REVERENDO IN CHRISTO PATRI D. IOANNI TRITHEMIO,

Et c. Nicolaus Prior in cunctis fidelis, Salutem.

REVERENDE amantissimeq; pater, literas reuerendæ paternitatis tuæ cum ingenti suscepisti gaudio, & supra quod dici potest de bona valetudine tua optimoq; statu apud principem, sicut nobis Theodoricus retulit, sum lætatus, & mecum fratres vniuersi. Sed ingenti me tri-